



Savjet da se iskoriste vremena milosti i oprosta (Meka)

Hatib: dr. Abdullah ibn Avad el-Džuheni

26. ramazan 1445. po Hidžri / 5. april 2024.

Sva hvala pripada Gospodaru Koji određuje sudbine, Koji mudro stvara, naređuje olakšane propise, Koji smjenjuje dan i noć. Neka je hvala Svevišnjem, Vječitom, Koji je odredio nestanak stanovnicima ovog svijeta, kako bi nam ukazao na to da sve što postoji odlazi i nestaje. On nam je određene dane učinio odabranim kako bismo tad osjetili povjetarac Njegove milosti, doživjeli sveobuhvatnost Njegove milosti, vidjeli neograničenost Njegovog darivanja. Ti mubarek dani se smjenjuju upravo kako bismo se pokajali i Gospodaru se vratili, kako bismo se prisjetili Njegovih blagodati i kako bismo Mu se zahvaljivali.

Svjedočim da nema boga osim Allaha, Jednog, Jedinog, Koji je utočište svakom. On je Allah, nije rodio i rođen nije, i niko Mu ravan nije. Svjedočim da je Muhammed Allahov poslanik, Njegov odabranik i miljenik, neka su salavat i selam na njega, na njegovu porodicu, ashabe i na njihove vjerne sljedbenike sve do Sudnjeg dana.

Poštovani vjernici! Imajmo vjeru u Gospodara svjetova, nemojmo odustati od Njegove milosti. On je Milostivi, Samilosni! Budimo bogobojazni i Njemu pokorni, jer je to put koji vodi ka zadovoljstvu Allaha, Milostivog i Samilosnog, Čija se milost očituje u Njegovim riječima: "A milost Moja obuhvata sve" (El-A'raf, 156).

Primjer Allahove milosti i kako će zaštititi ljude od sramote prilikom svođenja računa na Sudnjem danu sadržan je u hadisu koji prenosi Abdullah b. Omer, radijallahu anhu, koji je čuo Allahovog Poslanika, sallallahu alejhi ve sellem, da kaže: "Uzvišeni Allah učinit će da Mu vjernik bude blizu, prekrit će ga Svojom mилоšću i sakrit će ga od ljudi. Potom će ga pitati o grijesima, govoreći: 'Da li se sjećaš ovog grijeha? Da li se sjećaš onog grijeha? Da li se sjećaš kad si ovo uradio?' Kada mu sve njegove grijehe prikaže, a ovaj pomisli u sebi da je propao, Uzvišeni će mu reći: 'Ove grijehe sam ti





sakrio na dunjaluku, a danas ti ih praštam!’ Njemu će knjiga djela biti data u desnu ruku, dok će za nevjernike i licemjere “svjedoci reći: ‘Ovi su izmišljali laži o Gospodaru svome!’ Neka Allahovo prokletstvo stigne mnogobošce” (Hud, 18). (Buhari i Muslim)

Poštovani vjernici, mjesec ramazan uistinu je veličanstven mjesec. Uzvišeni Allah darovao ga je kao počast ovom muhammedanskom ummetu i odredio je da u njemu bude velika noć koja se u životu jednog čovjeka vraća samo jednom u godini, a to je Lejletul-kadr, noć koja se nalazi u zadnjoj trećini mjeseca ramazana, što je dokazima kategorički potvrđeno; a veća je vjerovatnoća da je u neparnim noćima. Poslanik, sallallahu alejhi ve sellem, rekao je: “Tražite Lejletul-kadr u neparnim noćima posljednjih deset dana ramazana.” (Buhari)

Uzvišeni Allah odredio je da svako dobro djelo, svaki ibadet i svaki zikr vrijedi kao kada se čini 83 godine izvan te noći, odnosno, tokom hiljadu mjeseci. Jer, Noć kadr vrednija je od hiljadu mjeseci! Uzvišeni je o vrijednosti te noći objavio posebno cijenjene riječi, donesene po posebno cijenjenom meleku, kazivane jezikom posebno cijenjenog Vjerovjesnika ummetu posebno cijenjenom. A zato što je to noć “u kojoj se svaki mudri posao riješi”, ko bude tad činio pokornost Allahu, postat će posebno cijenjen i uvažavan. Uzvišeni Allah kaže: “Mi smo ga počeli objavljivati u Noći kadr – a šta ti misliš šta je Noć kadr? Noć kadr bolja je od hiljadu mjeseci – meleki i Džibril, s dozvolom Gospodara svoga, spuštaju se u njoj zbog odluke svake, sigurnost je u njoj sve dok zora ne svane.” (El-Kadr, 1–5)

Tu posebno vrednovanu i obilježavanu noć časni je Kur’an učinio vječnom zauvijek. Lejletul-kadr zapravo je ostavljena neodređena, kao što je neodređeno vrijeme u kojem se uslišava dova u danu petka, iz milosti prema ljudima, kako bi marljivo činili ibadet, kako bi marljivo tragali za nagradom te noći obavljajući namaz i izgovarajući zikr, upućujući dove i skrušeno se moleći Allahu. Na taj način bit će sve bliži i bliži Allahu, te će imati sve veću i veću nagradu. Poslanik, sallallahu alejhi ve sellem, kazao je: “Ko oživi Noć kadr, vjerujući u Allaha i nadajući se Njegovoj nagradi, bit će mu oprošteni raniji grijesi.” (Buhari)





U toj noći trebamo često ponavljati riječi: "Gospodaru naš, Ti si milostiv, voliš praštati, pa nam grijehe naše oprost", kao što se navodi u vjerodostojnom hadisu koji prenosi majka pravovjernih Aiša, radijallahu anha, da je Poslanik sallallahu alejhi ve sellem, tako postupao. Ova je dova slika sažetog jezgrovitog Poslaničkog izraza, jer ako čovjeku Svevišnji daruje oprost, poslije toga će mu darovati sve što mu koristi, te će podariti da ga ne snađe ništa što mu nanosi štetu. Zato, vjerniče, budi bogobožan, nemoj propustiti životne prilike. Slijedi čestitog i najodabranijeg, sallallahu alejhi ve sellem, koji je ulagao više truda nego što bi inače u drugim noćima ramazana. Svoj bi kaiš stegao i svoje bi supruge budio da ibadete.

U ovim danima Poslanik, sallallahu alejhi ve sellem, također bi bio u itikafu, u ovim vremenima svoju bi dušu posvetio ibadetima Svevišnjem, time bi se zaokupirao, smanjio bi kontakt s ljudima, a iz srca bi uklanjao sve što će ga zaokupirati od spomena imena Božijeg.

Zato, o vjernici, budimo bogobožni, izložimo se povjetarcima milosti Darežljivog Opskrbitelja. Zastanimo skrušeno pred kapijom Jedinog i Plemenitog, podignimo ruke Milostivog i Blagom, Koji u Svojoj Knjizi objavljuje: "Ha-mim. Tako Mi Knjige jasne, Mi smo počeli da je u Blagoslovljenoj noći objavljujemo – i Mi, doista, opominjemo – u kojoj se svaki mudri posao riješi po zapovijedi Našoj! Mi smo, zaista, slali poslanike kao milost Gospodara tvoga – On, uistinu, sve čuje i sve zna" (Ed-Duhan, 1–6).

Poštovani vjernici! Abdullah b. Kajs prenosi da je Aiša, radijallahu anha, kada je upitana o ljudima koji tvrde da sve dok obavljaju strogo naređena (farz) djela, ne brinu o tome da li trebaju činiti druga dobra djela, rekla: "Života mi mog, Uzvišeni Allah će ih isključivo pitati o farz-djelima. Ipak, ti ljudi griješe po danu, a, također, vi ste i vaš Poslanik jedno nerazdvojivo. A ja nikad nisam posvjedočila tome da je Poslanik, sallallahu alejhi ve sellem, izostavio noćni namaz, čak kada bi se razbolio, klanjao bi sjedeći." Potom je navela svaki ajet u kojem se spominje noćni namaz. (Mervazi)





Zato, Božiji robovi, savladajmo sebe kako bismo činili djela pokornosti Allahu i borimo se da ustrajemo u tome. Svojim životima dajmo vrijednost čineći dobra djela. Iskoristimo ova mubarek vremena čineći dobra djela, klonimo se loših, te žurno počnimo činiti djela pokornosti prije nego što bude kasno.

Gospodaru naš, podari da Noć kadra oživimo ibadetima, vjerujući i nadajući se nagradi. Podari nam nagradu kakvu si darovao Svojim iskrenim robovima. Podari nam snage da Ti se zahvaljujemo, da Tvoje ime spominjeno i da Ti ibadet dostojno činimo. Gospodaru naš, zaštiti nas od zla naših duša i od naših zlih djela. Smiluj se našoj slabosti i našim manjkavim djelima; oslobodi nas svake brige i nemoj učiniti da nad nama likuju neprijatelji i zavidnici.

Gospodaru naš, podari nam da dostojno donosimo salavat i selam na plemenitog Poslanika, kao što si nam naredio u časnoj Knjizi: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56).

Gospodaru naš, blagoslovi Muhammeda i rod Muhammedov, kao što si blagoslovio Ibrahima i rod Ibrahimov. Zaista si Ti hvaljen i slavljen. Gospodaru naš, obaspi blagodatima Muhammeda i rod Muhammedov, kao što si obasuo blagodatima Ibrahima i rod Ibrahimov. Zaista si Ti hvaljen i slavljen.

"I obavljaj molitvu, molitva, zaista, odvraća od razvrata i od svega što je ružno; obavljanje molitve je najveća poslušnost! – A Allah zna šta radite." (El-Ankebut, 45)

